

Prasta ruoda

Rodou. Nuors jau è spalís, dèinas pasètaikè poikès, saulietas. Dèrvalie pri kelè kuokiū keturiuolèkas a penkiuolèkas metu mergelè ruovè batvinius. Ana bova apsèvèlkosi marga nažutkele, plaukelè sorèštè i bèzieli. Vèino žuodio, mergelè bova straini. Tiktā nu pat vaikīstè toriejè bieda – bova puonèška ont ausieliu.

Norautus batvènius metè i kopèta. Paskiau, atsèsiedosi ont krieslelè, katrou bova atsènešosi èš nomū, anus so peilio čīstèjè. Pavakarie atvažious sosieds Jozè so arklio, è batvènè būs nomèi.

Kelio pravažiou kuoks papunis so arklio, atsèsiedès i ratus. Pramīnè, dvèrati apsèžergès, kažkuoks žmuogielís, vo motrèškelè su kaneliems noejè i ganīkla pri karviu. I ruoviejè nieks nekreipè diemesè.

Praeit pakeleivis, so aulènès batās apsèavès, kelnès i anus sosèkritiuojès, šmolè beretè on galvo, so šèkšnènio dèržo par pieti pasèkabènès nešies tašè. Prèsègretènès tèis ruoviejè ožkalbèna:

- Laba dèina, doktèrelè!
- Batvènelius kraunu.
- Sakīk, a tievalis, mamalè nomèj?
- Īr vèsuokiū: è dèdèliū, è mažū.
- Vo kas tau anus parveš?
- Mon ruodus, ka pašuolè nebūs, tad è neapkrausio.
- Bet bènt tamista neprègèrdi auseliems?..
- Je, je, doudam vuožkā è aveliems.

Keliauninks reg, ka so anou nikuoki ruoda nešèit, paeidams è saka:

- Ēk, ēk sobènalè!..
- Sodèivo, sodèivo, puonali!

Dā so dešènè ronko pamuojava – palinkejè gera kelè.